

Najib pulang dari Sabah tanpa RCI bagi Projek IC
MalaysiaKini.com
February 18,2012

Perdana Menteri, Datuk Seri Najib Tun Razak pulang dari Sabah selepas melakukan lawatan dua hari ke negeri itu semalam - tetapi tanpa sebarang pengumuman mengenai penubuhan suruhanjaya siasatan diraja (RCI) bagi Projek IC seperti yang diuar-uarkan sebelum itu.

Menteri Sains, Teknologi dan Inovasi Datuk Dr Maximus Ongkili sebelum ini berkata mesyuarat Kabinet minggu lalu telah membincangkan mengenai RCI yang dicadangkan untuk menyiasat dakwaan pendatang tanpa izin diberi kerakyatan dan hak untuk mengundi, yang dikenali sebagai Projek IC.

Maximus, yang juga timbalan presiden Parti Bersatu Sabah (PBS) dan pengerusi jawatankuasa terpilih parlimen mengenai pembaharuan pilihan raya, berkata suruhanjaya diraja itu akan menyiasat kontroversi itu secara terperinci.

"Kenapa ini berlaku, siapa yang melakukannya dan apa yang patut dilakukan kepada orang yang melakukannya?" katanya.

Seorang lagi menteri dari Sabah, Menteri Perusahaan Perladangan dan Komoditi, Tan Sri Bernard Dompok, yang mengambil kredit bagi cadangan penubuhan RCI itu, berkata ia perlu dilakukan sebelum pilihan raya umum akan datang.

"Jika tidak, rakyat mungkin berfikir kita melakukannya hanya untuk pilihan raya."

Menurutnya, kabinet telah memberi mandat kepada Najib untuk mengumumkan keputusan tersebut.

Copyright © 1999-2012 Mkini Dotcom Sdn. Bhd
<http://www.malaysiakini.com/news/189523>